

FJALA E DEPUTETIT GAZMENT BARDHI

Ë HËNË DATA 05 QERSHOR 2023

Të nderuar kolegë,

Të dashur bashkëqytetarë,

Këto ditë mësuam se qeveria ka rritur tarifën e korrupsionit. Nga një tender modest prej 8 milionë lekësh i Ministrisë së Shëndetësisë kuptuam se tarifa e korrupsionit ka shkuar 40%. Kur Kryeministri i sotëm i hyri politikës, ai njihej si “Mister 10-përqindëshi”. Ky është një politikan, i cili e bazoi karrierën e tij te korrupsioni dhe prej 25 vjetësh nuk njuh të ndalur. Sot kemi një Kryeministër me një etje të pakufishme për pushtet. Sa më e madhe dëshira për pushtetin, aq më i madh korrupsioni. 40% vjedhin këta vetëm me një tender, por duan që populli të besojë se ky është një rast i izoluar, se këta nuk janë të gjithë kaq hajdutë sa ishte, në fakt, zëvendësja apo vartësja, bashkëpunëtorja më e afërt e ministres së Shëndetësisë. Populli thotë se peshku qelbet nga koka dhe ka shumë të drejtë. Aty ku ka vullnet, korrupsioni luftohet me të vërtetë, as bëhet teatër e as ushtrohet presion ndaj drejtësisë. Merrni rastin e suksesshëm të Moldavisë! Aty po ndodh një luftë spektakolare kundër korrupsionit, sepse në krye të kësaj lufte qëndron një Kryeministre e ndershme, e zgjedhur me votë të lirë, që ka frymëzuar të rinjtë, profesionistët dhe shoqërinë moldave për t’u bërë pjesë e kësaj beteje të vështirë, por Shqipëria është vite dritë larg Moldavisë. Pas dy dekadash e gjysmë në pushtet, Edi Rama jo vetëm nuk ka bërë kurrë ndonjë gjë për të luftuar korrupsionin, por ka ndërtuar një sistem shkatërrues për demokracinë. Cili nga ju sot, kolegë të mazhorancës, do të dilte të thoshte se tarifa e korrupsionit në qeverinë tuaj nuk është 40%? E keni të pamundur t’i mohoni faktet që ka sjellë SPAK-u për rastin e tenderit në Ministrinë e Shëndetësisë. A na mjafton neve rasti i SPAK-ut? Absolutisht jo, prandaj, në vend që ta sulmojmë, duhet ta inkurajojmë. E di që është e vështirë, e di që qeveria, Kryeministri dhe emisarët e tij janë në përpjekje të vazhdueshme për të kontrolluar drejtësinë, por s’ka asnjë shpresë tjetër konkrete që diçka në këtë vend të ndryshojë për mirë! Korrupsioni është një çështje që prek çdo aspekt të jetës sonë, jo më kot ai zë vendin e parë në çdo sondazh dhe hulumtim të shoqërisë sonë. Mbi 80% e shqiptarëve e shohin korrupsionin si problem kyç dhe, me të drejtë, duan që kjo të ndryshojë, sepse korrupsioni përkeqëson shërbimin në sistemin tonë shëndetësor, përkeqëson arsimin e fëmijëve dhe të rinjve, mbytet të drejtat e njeriut, vë në rrezik sigurinë kombëtare, dëbon njerëzit nga atdheu i tyre, zbraz buxhetin e shtetit për të mbushur xhepat e qeveritarëve, dobëson njerëzit e zakonshëm dhe fuqizon njerëzit me pushtet dhe krimin e organizuar. Çfarë vlere ka rritja e pagave, kur korrupsioni mbretëron në Shqipëri? 40% e taksave tuaja, të nderuar qytetarë, vidhen; 40% e pasurive kombëtare vidhen.

Mos harroni, nga 10%, kur mori për herë të parë pushtetin, Edi Rama e ka çuar në 40% taksën e korrupsionit! Mendoni sa shumë kemi humbur nga korrupsioni në shëndetësi, në arsim e në infrastrukturë. Një vend kaq i vogël dhe kaq i pasur sa yni, duhet të ishte një Zvicër në zemër të Ballkanit, por korrupsioni na ndalon të begatohemi, na ndalon të punojmë në vendin tonë dhe të fitojmë me djersën tonë. E shoh që nuk po rrini rehat në karriget tuaja, zonja dhe zotërinj ministra, e kuptoj që ju krijon alergji lufta kundër korrupsionit. Për shembull, ju mund ta ndihmoni drejtësinë drejtpërdrejt duke rrëfyer rastet në dikasteret tuaja. Për shembull, zonja Zëvendëskryeministre, sa e

keni tarifën e korrupsionit në ministrinë tuaj? E keni biseduar me sekretarin tuaj të Përgjithshëm? Në pjesën e luanit të fondeve të rrugëve dhe të energjisë, ju patjetër duhet ta keni mbi 40% gjobën për çdo prokurim publik. Pyeteni dhe na e thoni! Edhe ju, zonja Ministre e Financave, në ministrinë tuaj duhet të jeni në një garë të fortë me Ministrinë e Shëndetësisë dhe me Ministrinë e Infrastrukturës për të zhvatur sa më shumë nga fondet publike përmes tenderëve dhe procedurave korruptive. Sot nuk vihet më në diskutim a merrni 40% të vlerës së tenderit, por sa më shumë se kaq merr secili prej jush. Pyeteni edhe ju sekretarin tuaj të Përgjithshëm, jo atë të arrestuarin, për normën e gjobës në tenderët në ministrinë tuaj. Nëse nuk jeni e kënaqur prej tij, pyesni sekretarin e Përgjithshëm të paraardhësit tënd. Njerëzit e tij i lëviznin paratë e korrupsionit me thasë nga njëra shtëpi në tjetrën, derisa përfunduan në shtëpitë e sanitareve. Zonja Ministre e Shëndetësisë, si ka mundësi që heshtët për skandalin në ministrinë e tuaj, duke mos u distancuar nga aktet korruptive të bashkëpunëtores suaj më të afërt? Ju, në fakt, dëshmoni se korrupsioni i sekretares suaj të Përgjithshme nuk është një rast i izoluar. Ju tregoni se jeni pjesë dhe i shërbeni një sistemi të kalbur nga korrupsioni. Do të ishte në nderin tuaj të jepnit dorëheqjen. Të tregoni me fakte, se nuk jeni bërë pis. Të tregoni me vullnetin tuaj të lirë dhe jo me propagandë boshe se e mbështesni drejtësinë dhe i hapni rrugë drejtësisë për të hetuar deri në nivelet më të larta, deri te ju. Por ju e humbët këtë shans.

Nëse ju ngushëllon si fakt, nuk jeni e vetme. Ju mësoni nga më profesionisti në punët e korrupsionit, nga kryetari juaj legjendar, që u kap me presh në duar me aferën "McGonigal", dhe vazhdoi të sillet sikur nuk ka ndodhur asgjë! A e keni vënë re? Sa herë i shpërthen një skandal korrupsioni në nivele të larta, Edi Rama thotë: "Nuk di gjë". Nuk dinte asgjë për Saimir Tahirin, megjithëse ne ia thamë përditë për katër vjet rresht! Nuk dinte asgjë për inceneratorët, megjithëse ne prapë i denonconim çdo ditë! Me shumë gjasa nuk di asgjë as për Vangjush Dakon, i cili po hyn e po del shumë shpesh nga SPAK-u këto kohë. Fraza e vjetruar e tij "Nuk bëhet mburojë për askënd", shërben vetëm sa për demagogji. Dalja nga burgu e Saimir Tahirit i rrëzoi gjithçka dhe provoi se Edi Rama është peng i korrupsionit dhe krimin të organizuar. Ai është një minus i vërtetë i demokracisë sonë dhe përfaqëson një shans të humbur për mirëqenien e shqiptarëve. Historia na ka mësuar se regjimet autoritare janë ndërtuar mbi korrupsionin. Kjo që kemi ne sot, nuk është demokraci. Kush thotë të kundërtën, gënjen veten dhe këdo tjetër. Ne nuk mund të nisim të ecim përpara, pa nisur ta luftojmë seriozisht korrupsionin. Edi Rama ka dështuar ta bëjë këtë, sepse ai i blen zgjedhjet. Stabiliteti që ai ofron për komunitetin ndërkombëtar, është një fasadë e rreme, e ndërtuar mbi një sistem korrupsioni që gëlon në çdo qelizë të qeverisjes. Kjo duhet të ndryshojë, dhe e vetmja mundësi që të ndodhë, në mënyrë që të mos na shembet mbi kokë çatia, e ngrënë tashmë nga korrupsioni, janë zgjedhjet e lira, të pandikuara dhe të pablera me paratë e korrupsionit. Për Shqipërinë, ky është shpëtimi i vetëm. Problemi më i madh sot në Shqipëri është se njerëzve u ka shteruar besimi se politikanët mund të ndryshojnë diçka, dhe kanë të drejtë. Diskutimi i tyre, për fat të keq, është se cila nga palët politike ka bërë më shumë korrupsion se tjetra. Humbja e besimit të njerëzve është një lajm i keq për vendin, por sot dua t'u them mijëra të rinjve dhe të rejave që mendojnë kështu se nuk kanë plotësisht të drejtë. Në këtë sallë, në fakt, nga të dyja krahët ka njerëz të ndershëm që mund ta ndryshojnë këtë situatë katastrofike për vendin dhe Shqipërinë. Në këtë sallë ka politikanë që e kanë provuar veten se nuk i dorëzohen korrupsionit. Kjo është një situatë emergjente që duhet ndryshuar dhe duhet të na bëjë të gjithë bashkë. Ne, të dashur qytetarë, mund ta ndryshojmë së bashku me kurajë, me guxim dhe ndershmëri! Faleminderit!